

Christoph Mörgeli sto tadlar critica massiva

Il «Bund» ha publitgà extracts dal rapport academic

DA CLAUDIA CADRUVI / ANR

■ **Ins è disà ch'el parta ora dret e sanester – ma cunzunt vers la sanestra. Uss vegn Christoph Mörgeli sez sut squitsch e quai entras ses schef nov Flurin Condrau. Ier ha il «Bund» publitgà ina contribuziun che munta in culp fatal per la reputaziun dal cusseglier nazional.** Cun in surrir crititgescha *Christoph Mörgeli* ses adversaris politics. Il professor per istorgia medicinala na sa restrenscha betg d'exprimer sia opiniun. Anzi, el fora gugent cun teccas persunalas. Sch'el chatta adagur in sbagli tar in concurrent politic n'enconuscha Mörgeli ni remischun ni perdun e commentescha cun spretsch il cumportament.

Ier ha il «Bund» publitgà extracts dal rapport academic annual 2011 da l'Institut d'istorgia medicinala a Turitg. Il rapport constatescha mancanzas en las domenas che Mörgeli tgira entaifer l'istitut, cunzunt en ses museum.

Pertge n'è il rapport betg public?

Tut ils rapports academics chattan ins sin la pagina d'internet da l'istitut. Ma quel dal 2011, lez manca anc. Quest rapport ha scrit *Flurin Condrau*, il nov schef da Mörgeli. Al «Bund» ha ditg Condrau: «Jau hai dà giu ad uras il rapport academic. La direcziun da l'università n'ha fin uss anc betg dà liber il rapport.» Pli blier n'ha el betg vuli tradir «pervi da motivs giuridics».

A l'Universitad da Turitg enconuscha gia in vast ravugl da personas il rapport ed uschia ha er il «Bund» procurà las 30 paginas. La gasetta bernaisa citescha entiras passaschas.

Midà nagut dapi 22 onns

Il museum per istorgia medicinala cuntegna mendas e saja senza dubi antiquà, hai num en il rapport. Ils ultims onns sajan ils museums vegnids professionnalsads. Da quai na sentian ins nagut en il museum. A curta vista stoppian ins ex-num curreger tschertas indicaziuns. A

lunga vista dovria quai ina nova concepciun da l'exposiziun sch'ins na veglia betg serrar il museum. «Actualmain munta il museum per l'istorgia medicinala scientifica ina gronda ipotoca.»

Pertugant il tema Aids relatta ina tabla d'infurmaziun en il museum: «Ina terapia efficazia na datti da preschent anc betg.» Quai valiva il 1990, scriva il «Bund». Dapi il 1996 existia ina terapia che levgeschia considerablmain la vita dals pazients d'aids.

In donn per l'entira universitad

La collecziun d'objects da l'istitut medicinal istoric tutgia para tar las pli grondas dal mund. 100 000 objects dumbria la collecziun, vegn pretendi. E quests objects avess Mörgeli da tgirar sco conservatur. Ma quant gronda che la collecziun è propi na sa nagin dir cun segirtad. Il rapport da Condrau palaisa che plirs dieschmillis objects na sajan betg cataloghisads e fetschian pulvra en curunas avertas. «Nus na pudain betg parter

dad ina collecziun scientifica e stin avant grevas decisiums. En quest cas sa tracti era fitg concret d'impedir donnets, giuridics e scientifics da l'istitut, da la facultad ed a la fin dals quintes da l'entira universitad.»

En quest connex menziuna il «Bund» che ossa d'umans na vegnia betg conservada a moda seriusa en la collecziun e che perfin baras na vegnian betg tegnidas si en urden.

Nagin vul tadlar prelecziuns da Mörgeli

Sper sia lavur da curatur ha Mörgeli sco professor da porscher prelecziuns. «Per ils students da tuttas facultads è vegni pur-

schì museologia medicinala. Questas prelecziuns n'han ins pudì manar atras ni durant il semester da primavaira ni en il semester d'atun 2011 pervi da mancanza da students. Davart las raschuns per la mancanza d'interess dals students pon ins mo specular, perquai che la prelecziun n'ha anc mai pudì vegnir realisada e damai ch'i n'existan uschia era nagins documents d'evaluaziun», stat scrit en il rapport.

Sulet la prelecziun da Mörgeli davart «Erzählte Medizingeschichte» saja vegnida realisada. En lezza prelecziun na cumpara Mörgeli dentant gnanca sez, ma bain anteriurs medis u professurs da medischina che raquintian da temps passads.

Il nov schef da Mörgeli ha num Flurin Condrau

Dapi il favrer 2011 è Flurin Condrau directur da l'Institut e dal Museum per istorgia medicinala a Turitg. Cunquei è Condrau il schef da *Christoph Mörgeli*.

Condrau è burgais da Mustér ed è creschì si ad Oberrieden (ZH) sco figl dal dentist Bernard Condrau.

Flurin Condrau ha studegià istorgia, sociologia ed economia publica a Turitg ed ha promovì a Minca cun ina

lavor davart l'istoriga da la tuberculoza. Avant ch'el è puspè sa chasà en Svizra ha el lavorà sco docent a l'Universitad da Sheffield ed a l'Universitad da Manchester.

Ier n'ha Condrau betg vulì prender posiziun davart il cuntegn dal rapport annual academic ed ha renvià al servetsch da medias da l'Universitad da Turitg. Ma era là n'han ins betg vulì dir dapli.



Il museum per istorgia medicinala a Turitg vegn visità en media da mo 35 personas a di.



Flurin Condrau, menader da l'istitut e dal museum per istorgia medicinala a Turitg, è il schef da Christoph Mörgeli.